

Date –02/09/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. ZPM chuan Memorandum of Settlement (MoS) leh Inner Line Regulation (ILR) chungchangah Assembly pawn lama Debate neih tul an tih loh thu an sawi.
2. Tualthattu a puh, police kut atanga tlanchhuak Mualthuam N mi Denghmingthanga chu ni 2 chhung zawn a nih hnuah hmuh a la ni lo.
3. Manipur Legislative Assembly thutkhawm vawiina tanah kum thum hnua a vawikhat nan Kuki-Zo hnam MLA pahnih te a hmunah an tel ve thei.
4. India chuan vawiin khan Nepal tuilian tuarte chhawmdawlina turin damdawi leh bungrua tonne 5.5 phur thlawhna a vawi nga nan a tirlut leh..

<><><>

ZPM PR

ZPM chuan Memorandum of Settlement (MoS) leh Inner Line Regulation (ILR) chungchangah Assembly pawn lama Debate neih tul an tih loh thu an sawi.

ZPM Media and Publicity Department chuan thuchhuah siamin Mizoram Legislative Assembly Session thla kalta ni 27 a neihah Dr. Lalthangliana, MLA chuan Memorandum of Settlement (MoS) leh Inner Line Regulation (ILR) hmanga Calling Attention Motion a putluh chungchangah Chief Minister Pu Laldulhoma chuan debate neih ni se tiin a rawt a, Leader of Opposition Pu Lalchhandama Ralte MLA chuan Debate neih a nih theih nan Assembly Session chu ni khat dang pawh sei ni se ti a rawt ve thung a, amaherawhchu he rawtna hi Speaker-in emaw, a rawttu ngei leh Member dang tute mahin an sawi zui tak loh avangin Assembly House chhungah chuan Debate chu neih a ni ta lo a ni an ti a.

Hemi chungchang hi fiah takin Chanchinthar thehdarhtu hrang hrang ten sawizuiin, thudik tak hre duh tan chuan a fiahin a chiang thawkhat hle tih ZPM Media and Publicity Department chuan sawiin hemi avang hian ZPM chuan Assembly pawn lama Debate neih chu tul an tih tawh lo an ti.

ZPM Media Chairman Pu B Lalchhanzova chuan chuan Chief Minister in Law College a thusawi chu MNF sulhnu chu a chhe zawng emawa chinpawr chu an

tum a ni lova, thangthar te hriattur pawimawh a sawi maiah an ngai a ti a, inhnial chu Chief Minister chuan chak viau mahse, inhnial chiam kha tul rih lovah ZPM Party chuan a ngai a ni a ti.



MCON GRADUATION

Mizoram College of Nursing (MCON) Graduation and Lamp Lighting Ceremony vawi - 39na chu vawiin khan Mizoram College of Nursing, Falkawn ah neih a ni a, Health & Family Welfare Minister Pi Lalrinpuii leh Aizawl South III MLA Baryl Vanneihsangi ten an hmanpui a ni.

Pi Lalrinpuii chuan zirlai graduate thar te chu an hnathawhna hmun tinah mahni mihring pui te zah chung a midangte tana malsawmna ni turin a chah a. Zirlai kal chhuak te chu khawi hmunah pawh thawk se, an hna chu mihringte tana rawngbawl a ni tih reng hre reng turin a fuih a. Nurse chu damchhunga midangte enkawl nana hun hman a nih angin, an taksa hriselna leh rilru hriselna venghim turin a chah a ni.

Pi Lalrinpuii chuan Nurse hna chu Mizoram chhung mai nilo, India ram hmun dangah leh ram danga an thawh hunah pawh inngaihtlawmna, inzahna, taimakna leh kristian kan ni tih rilru pu chung a nurse hna thawk zel turin a chah a ni.

Byte of Pi Lalrinpuii

MLA Pi Baryl Vanneihsangi pawhin thu sawiin, zirlai zir chhuak te chu an thlen chin ah duhtawk mai lo in sang tak thleng turin a chah a. Mipui rawngbawl an nihna inhre rengin, hmangaihna leh inpekna tak tak nen, ringtute nun dan ang taka nung a nurse rawngbawl hna thawk turin zirlai kal chhuakte chu a chah a ni.

Byte of Baryl Vanneihsangi

Mizoram College of Nursing (MCON) Graduation vawi - 39na hmannah hian zirlai 32 an graduate a ni.



MUALTHUAM N CASE

Tualthattu a puh Denghmingthanga thlahlui ni 31 zanlai a Lunglei Police Custody atanga tlan chhuak chu ni 2 chhung Police te bakah veng thenkhat YMA ten an zawng chung pawhin chanchin lak lai thleng hian man a la ni lo.

Kan corr thudawn danin, hemi zana duty Officer leh Lock up vengtu te pawh thuzawhfiah an ni a, a tul anga hmalak zel a ni a, hetihlai hian Tualthattu a ngaih tlan chhuak man ala nih loh avang hian nunau tam tak an ralti hle niin kan corr chuan a sawi.



CONG PR

Congress Thalai (MPYCC) chuan Tanin a tang tlan chhuak an awm leh thin chu an ngaimawh hle tih sawiin, ZPM sorkar chuan Mizoram mipui dinhmun himlo ah a dah mek a ni, an ti

Congress Thalai chuan vawiin khan thuchhuah siamin. Mualthuam North tleirawl nunna hlu tak laksaktu a puh Denghmingthanga, Police kuta a awm lai leh kutkawl pawh a bun lai renga mipui mimir tan pawha him lo thei tura a tlan chhuak thei chu chuan makin a pawl a ti takzet a ni an ti a. Tun hnai a Jail tang tlan chhuak an awm ta fo mai chu Home Minister chak loh leh inthlahdah vang niin a hria an ti.

MNF leh ZPM Sawrkar kum reilote chhunga Jail tang tlan chhuak an tam ta lutuk leh an duh hun huna Jail tang te an tlan chhuak ta mai emaw tih tura a awm chu a pawl tak zet an ti a.

Kum 2022 atanga August 2026 chhungin Mizoram jail hrang hrang atangin tang tlan chhuak mi 74 an awm a. ZPM sorkar kum hnih leh a chanve chhung lek hian jail tang tlan chhuak an awm tam tawh hle tih sawiin Jail tang tlan chhuak zingah pawngsual leh tualthat thubuaia tang, rukruk leh in rawk ching an nih fur avangin a him lo hle a ni ti.

Kum 2024 Assembly Budget Sessionah Home Minister Pu K. Sapdangan Mizoram Jail dinhmun chhiat dan leh siamthat a tul zia sawiin, Jail tangte chu zana nula rima chhuak thinin zan rei tawh hnuaah jail-ah an rawn haw leh mnai thin ni a a sawi chuan amah leh a department chan ngei mualpho takin a siam a, a department chan a hneh loh zia mipui hmaah a tarlang a ni tih Congress Thalai te chuan an sawi a, hemi hnu lama a khat tawka Jail tang tlan chhuak an awm tak fo avang hian Home department ah hmasawna leh insiam that na a la awm chuang lo tih a lang chiang hle an ti bawk.

Congress Thalai thuchhuah chuan ZPM sorkar in Mizoram chhunga Jail hrang hrang te District Prison & Correctional Home ti a bming a thlak hnuaah mipui bumna atana hming thlak ringawta term hmang zo lo tur leh a tak taka hnathawk turin an hriattir tih an sawi ani.



KOLASIB PRE TRIAL DISPOSAL OF DRUGS

Cheng vaibelchhe 13, nuai 53, sing 4 hu ruihhlo vawiin khan Kolasib-ah tihral a ni.

Kolasib Bawrhsap leh NCORD Chairperson ni bawk Pu H. Dolianbuaia kaihhruaia District Level Narco Coordination Centre (NCORD) thutkhawm hnu vawiin khan heng ruihhlo te hi tihral a ni a, Ruihhlo tihral takte hi Heroin kg 1.767 leh Methamphetamine kg 12.5 niin, a vaiin kg 14.267 a ni. Hemi rual hian ruihhlo man kawnga thawk thate hnenah lawmman hlan nghal an ni bawk.

He hun kaihruaitu Bawrhsap Pu H. Dolianbuaia chuan thu sawiin, Kolasib chu state dang nena ramri hrula awm a nih avangin sualna ngampatna leh ruihhlo tawlhrukna atana hmun remchang a nih avangin ruihhlo do tur hian sawrkar chauh ni lovin, tlawmngai pawl leh khawtlang mipuite kan thawhho chhunzawm zel a ngai a ni, a ti.

Thutkhawmnaa Police report atanga a lan danin, kumin chhungin ruihhlo vangin mi 20 man an ni a, case 12 siam sak an ni. Heroin kg 2 leh gram 310 bakah Methamphetamine kg 21 man a ni a, hengte hi NCB rate-ah cheng vaibelchhe 25 chuang hu a ni.

Zu kaihnawih case 15 siam niin mi 20 man an ni a, zu man zawng zawng rate hi cheng vbc 1 leh nuai 46 hu a ni. Hemi bakah hian August thla chhungin hmun 13-ah ruihhlo that loh zia inzirtirna neih a ni a, mi 801 in an chhim a ni.

Vawiin meeting ah hian TNT report-in a tarlan danin, tun dinhmunah mipa 344 leh hmeichhia 77 enkawl lai an awm a, heng zinga 388 te hi Kolasib district pawn atanga kal an ni.

<><><>

KHAWZAWL

Khawzawl District Agriculture Department Staff te chuan thla hlui August ni 7 vel atanga Khawzawl District Rabung a Khùmzawl zau a Khau puang chu nimin khan a hmunah kalin an enfiah a.

Khùmzawl zauah hian Khau hi chawlhkar khatah vawihnih vel an inlar tlangpui a, boruakah an thlawh nuai nuai bakah thingkung leh thlai kung sangah te an bet fur thin a, thlai erawh beih leh tihchhiat an nei lo nia sawi a ni. Khau hi thla hlui August ni 28 atang khan an reh rih a, vawiin thlengin an puang zui tawh rih lo a ni.

Nimin khan Khawzawl District Agriculture Staff te chuan Khau puanna hmun te an tlawh a. Hetah hian loneitute kawmin thil chin chang an zawtfiah a, khau puang venna tur damdawi an sem ng ni.

<><><>

MIZORAM STATE LEGAL SERVICES AUTHORITY

Naupang harsatna tawh mekte Court-ah an kal huna an intihhlimna tur bungrua chi hrang hrang Gauhati High Court Judge, Mizoram State Legal Services Authority Executive Chairman, Justice Nelson Sailo chuan Mizoram State Commission for Protection of Child Rights hnenah a hlan.

Naupang inawmhlina tur hmanrua te hi Aizawl District Court, Child Friendly Room-a dah tur a ni a, he hunah hian thusawiin Justice Nelson Sailo chuan India Sawrkarin naupangte humhimna tur dan tam tak a siam a, nakina ram hruaitu turte an la nih avangin naupangte zingah Court-a kal ngei ngei ngai an awm changa Court chu hmun hlauhawm emaw an tih lohna turin an tan intihhlimna tur dah a tul a ni a ti. Legal Services Authority chuan Aizawl-ah chauh lo pawh District Court hrang hrangah Child Friendly Room-a dah tur naupangte inkhualtelemna hmanrua a ruahman chho zel a ni a ti.

Child Welfare Officer Pi Lalhmingchhuangi sawi danin, kum 2024 atanga 2026 chhungin Aizawla Child Friendly Room-ah naupang 1145 hruai an ni tawh a, chung zinga mi 207 chu naupang pawngsual tawh an ni a ti.

Mizoram State Commission for Protection of Child Rights Chairperson Pu Jimmy Laltlanmawia chuan Court-a naupang hruaite’n hlim taka hun an hman theihna tura naupangte chung a pawikhawihu ten an thil tihsual ang taka hremna an hmuh theihna tura naupangte Court-a hruai an ngai thin hi a pawh takzet a, chutihrualin, naupangten Court hi hmun hlauhawm leh tihbaiawm-ah an ngaih lova, dik taka rorelna a nihna hmun tih an hriat theih nan te, hlim taka hun an hman theihna tura ngaihsaktu an nei chu lawmawm a tih thu a sawi bawh.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MANIPUR

Manipur Legislative Assembly 12-na thutkhawm vawi 8 na chu vawiin khan tan a ni a. Ni thum chhung awh tur he thutkhawm hi tun thla ni 7 thleng neih a ni ang.

Tun tum Manipur Assembly session ah hian Kuki-Zo hnam atangin MLA pahnih- Haokholet Kipgen leh Kimneo Haokip Hangshing te chu a hmunah an tel ve thei a. State chhunga chi leh chi inkar buaina nasa tak a chhuah hnu kum thum hnuah a hmasa ber atan an hmun ngeiah an tel ve leh thei ta a ni.

MLA Haokholet Kipgen chuan Assembly Session an tel leh thei chu lawmawm atih thu a sawi a. Chief Minister Yumnam Khemchand Singh pawhin state chhunga inpumkhatna leh remna thlen tura rahbi pawimawh tak anih thu a sawi a ni.

Vawiin inkhawm tan ni ah Member thi sun anih bakah Report of the Comptroller and Auditor General of India, Manipur Private School (Registration and Regulation) Rules, 2024 and the Manipur Town leh Country Planning (Sixth Amendment) Ordinance, 2026 te house dawhkanah pharh a ni.

<><><>

NEPAL

India chuan vawiin khan Nepal tuilian tuarte chhawmdawlina turin damdawi leh bungrua tonne 5.5 phur thlawhna a vawi nga nan a tirlut leh. External Affairs Minister Dr.S.Jaishankar-a chuan he thu hi social media lamah tarlangin he thlawhnaah hian chhanchhuah hna thawk tur mi 11 an chuang tel a ti a. Hetihlai hian member 19 awmna Indian forensic team-te chuan DNA sample endik hna thawk mekin mitthite nihna zawnychhuah hna an thawk mek bawk a ni.

Hriat theih chinah Nepal tuilian avanga thi zat hi mil100 an chuang tawh a. Mi sang chuang biak pawh theihlohin an la awm bawk a ni.

<><><>